

Pinngitsoorani digitalikkut atassuteqarneq il.il. pillugu inatsisini aalajangersakkat assigiinngitsut allannguutaat pillugit inatsimmi § 49-p Kalaallit Nunaanni atuutilersinneqarnissaanut peqqussut (Digitalimik pinngitsoorani attaveqatigiinnissaq aamma oqartussaaffimmik il.il. nuussinerup kinguneranik tulluarsaanerit)

UAGUT MARGRETHE AAPPAAT, Guutip saammaassineraqut Danmarkip Dronningia, uppernarsarparput:

Pinngitsoorani digitalikkut atassuteqarneq il.il. pillugu inatsisini aalajangersakkat assigiinngitsut allannguutaat pillugit inatsit nr. 1231, 18. december 2012-imeersumi § 70, imm. 3¹, malillugu (Digitalimik pinngitsoorani attaveqatigiinnissaq aamma oqartussaaffimmik il.il. nuussinerup kinguneranik tulluarsaanerit) aalajangersarneqarpoq:

§ 1

Aningaasaliisartunut aningaasalersuisartunullu qularnaveeqqusiisarnermik aningaasaateqarfik pillugu inatsisimmi, kunngip peqqussutaa nr. 137, 9. marts 2005-imeersukkut Kalaallit Nunaannut atuutsinneqalersumi, peqqussut nr. 1048, 1. september 2010-meersukkut, peqqussut nr. 1047, 1. september 2010-meersukkut, inatsit nr. 1556, 21 december 2010-meersukkut, peqqussut nr. 303, 27. marts 2012-imeersukkut, peqqussut nr. 685, 28. juni 2012-imeersukkut allanngortinneqartumi, tulluuttunik allannguisoqassaaq:

1. Kapitali 8 a-p kingorna ilanngunneqassaaq:

»Kapitali 8 b
Attaveqatigiinneq

§ 22 b. Pissutsit inatsimmut matumunnga ilaasut imaluunniit maleruagassat inatsit manna malillugu atuutilersitaasut pillugit Finanstilsynetimut taakkunanngalu attaveqatigiinneq digitalimik ingerlanneqarnissaa pillugu inuussutissarsiornermut ineriartortitsinermullu ministeri aalajangersaasinnaavoq.

Imm. 2. Digitalimik attaveqatigiinneq pillugu, ilanngullugit it-mik periutsit aalajangersimasut, digitalimik ilusiliinerit immikkut ittut kiisalu digitalimik atsiorterit assigisaanilluunniit atorneqarnissaannut maleruagassanik erseqqinnerusunik inuussutissarsiornermut ineriartortitsinermullu ministeri aalajangersaasinnaavoq.

Imm. 3. Digitalimik nalunaarut anngussimasutut isigineqassaaq nalunaarummik tiguisussamit tiguneqarsinnaaleraangami.

¹Aalajangersagaq imatut oqaasertaqarpoq: »*Imm. 1.* §§ 1-39, 41-50 aamma 53-68 Savalimmiunut Kalaallit Nunaannullu atuutinngillat, taamaattoq tak. imm. 3 aamma 4. *Imm. 2.* (ilaassanngilaq). *Imm. 3.* (ilaassanngilaq). *Imm. 4.* §§ 1-10, 17, 18, 23, 29, 35-39, 41-44, 49, 50, 54, 58-63, 65 aamma 66 kunngip peqqussutaatigut Kalaallit Nunaannut tamakkiisumik ilaannakortumilluunniit atuuttussanngortinneqarsinnaapput, Kalaallit Nunaanni pissutsit pisariaqartitaannik allannguutitalerlugit. *Imm. 5.* (ilaassanngilaq).«

§ 22 c. Finanstilsynetip inatsit manna imaluunniit maleruagassat inatsit manna malillugu atuutilersitaasut malillugit aalajangiinernik allakkianillu allanik atsiorneqanngitsunik, maskinamit assigisaanilluunniit assilineqartumik imaluunniit teknikkikkut periutsumik atsiorneqartunik, aalajangiinermik allakkiamilluunniit nassius-sisup kinaanerata paatsoorneqarsinnaannginneranik qulakkeerinnittumik atuillutik nassius-sisinnaanerit pillugu inuussutissarsiornermut ineriartortitsinermullu ministeri maleruagassanik aalajangersaasinnaavoq. Aalajangiinerit allakkiallu taamatut ittut aalajangiinernut allakkianullu inummit namminermit atsiugaasunut naligiissinneqarput.

Imm. 2. Aalajangiinerit allakkiallu allat, paasissutissanik taamaallaat elektronik atorlugu suliarinnineq tunngavigalugu aalajangigaasut imaluunniit allakkiaasut, taamaallaat Finanstilsyneti nassitsisutut taallugu saqqummiunneqarsinnaanerit pillugu maleruagassanik inuussutissarsiornermut ineriartortitsinermullu ministeri aalajangersaasinnaavoq.

§ 22 d. Inatsimmi matumani imaluunniit maleruagassani inatsit manna malillugu atuutilersinneqartuni allakkiaat Finanstilsynetimit pinnatik allanik allakkiaasut atsiorneqarsimanissaat piumasaqaataappat, piumasaqaat taanna eqqortinneqarsinnaavoq periutsumik, allakkiorsimasup kinaanera paatsuugassaanngitsumik paasineqarsinnaanerit qulakkeerinnittumik atuinikkut, taamaattoq tak. imm. 2. Allakkiaat taamatut ittut allakkianut inummit namminermit atsiorneqarsimasunut naligiissinneqarput.

Imm. 2. Atsiorneqarnissanik piumasaqaatip avaqqunneqarsinnaanera pillugu maleruagassanik erseqqinnerusunik inuussutissarsiornermut ineriartortitsinermullu ministeri aalajangersaasinnaavoq. Ilanngullugu aalajangerneqarsinnaavoq allakkiaat aalajangersimasut inummit namminermit atsiorneqarsimanissaannik piumasaqaat avaqqunneqarsinnaanngitsoq.«

§ 2

Peqqussut 1. august 2019-imi atuutilissaaq.
